



嘉興府志

ル 5
157
19



門九名5
1074
卷19

新編府志卷四十三

名宦二

嘉善縣

明

鄭汝字君之... 州人... 在嘉善...

... 州人... 在嘉善...

... 州人... 在嘉善...

... 州人... 在嘉善...

... 州人... 在嘉善...

嘉興府知府善化許瑤光重輯

名宦

嘉善縣

明

鄭時字習之沂州人歲貢生宣德初知玉田縣改嘉善性

坦易不尚刑罰時縣治初建百事未舉與僚佐夙夜經

營勞民動衆而下無怨言九載乞休

吳志

楊懋四川永寧人宣德三年任魏塘巡檢地當松秀要衝

有中使夜過舟重命懋括民舟挽之懋怒將檢閱其行

裝中使恐夜易小舟去有鹽徒行劫懋率兵追捕格鬪

數十合子殞賊手官兵稍卻懋氣益奮卒縛渠魁下獄

臬市臺府上其功加主簿俸時初分縣治委懋經營不

逾年而官廨學舍皆告成焉

浙江通志參嘉善于志

聶如斌豐城人宣德十年任典史職董水利令民廣築隄

防常潛乘小舸察民勤惰以行勸懲境內大水憲臣驗

荒者意有齟齬如斌即自投田間水深沒頂憲臣動容

民得免稅又以北鄉田久荒民苦賠輸督民高其圩塍

以備水患民皆賴之

浙江通志參吳志

李遜字時敏南豐人正統進士知縣事機警有吏才下不

能欺性寬易民有過笞之未嘗褫衣九載將行民詣上

官乞留事聞進秩本府通判後以征閩寇督餉有功陞

知廉州府

吳志參嘉善于志

陳勗字勉之宜興人任訓導學問宏博訓士子悉根義理

夜輒躬巡學舍察諸勤惰秩滿拜監察御史

沈律字應和崑山人由舉人中禮部乙榜授訓導性坦易

作起士類兩與福建河南同考官監生李萼有母妻喪

不克葬律首助之陞昌黎教諭

曾師孔惠安人由舉人任教諭勤于講授諸生貧而無書

者購畀之或有饋遺拒不納

以上嘉善于志

汪貴字良貴歙縣人成化進士知縣事廉潔獨介愛民如子歲汰無名之費數十萬錢倉庾學校多其構葺然性伉直短于應對不為當道所容又為政不便豪猾以是坐調瀕行橐篋蕭然擁留者數千人時華亭張莊簡公悅素知貴名白其賢家宰王端毅公恕疏令復任

吳志參嘉

善于

志

王緒字紹夫樂平人應天鄉試舉人授訓導立教尚嚴時學宮就圯緒不請有司勸鄉之尚義者助建學門溝庫舍登石闌新聖賢之像飾祭祀之器皆有程式同時訓導劉汝瞻字民望宣城人歲貢生為人清約講論斷斷

與緒寬嚴相濟緒秩滿擢知忠州汝瞻在任六年致仕

嘉善于志參
浙江通志

潘瑜龍溪人隆慶衛籍監生任邑丞剛果有為不惕于勢嘗謁臬司隸卒二人至瑜館有所索瑜留之密往白于臬司李延壽壯之即令推訊二人伏辜瑜剔刷百弊奸豪屏跡嘗廣學舍置義田陞長安知縣

嘉善于志

劉子厲字克溫江西人宏治進士知縣事性廉敏精悍斷獄律比銖兩重輕皆自出其手胥吏奉成案而已政雖嚴明中實慈惠操履清白或以權勢臨之屹然不動三載徵為監察御史

浙江通志參
嘉善于志

藍郁字國馨鹽城人宏治進士初知蘄陽改任嘉善操守廉潔愛民好士尤以厚風俗祛民患為亟有訟者輒以至誠動之不任刑而民自服甫一載卒于官嘉善志

區越字文廣新會人宏治進士正德元年知縣事少遊陳獻章之門慈祥簡靜得親民體平居無疾言遠色民甚懷之擢戶部主事

李錫字天祐登封人監生正德三年任主簿性侃直有大節八年江西姚源洞盜起犯衢州開化等縣錫應選率民兵往禦至開化之馬金街斬獲賊首三顆力屈被擒死于安仁之花橋贈本縣知縣後知縣張煥建尚節祠祀之

祀之

王德明字宗周清苑人正德進士知封邱縣改嘉善持法平允吏不能欺當道文移有不便者默寢之尤加意學校禮貌諸生累官山西巡撫僉都御史以上嘉善志

倪璣字公在咸寧人正德進士由諫垣謫邑丞素簡伉痛抑豪猾詢求民隱于財賦水利之法靡不究心創脩縣志建思賢書院毀淫祠嚴保甲置義塚及社學三載擢任邱知縣嘉善志

郭田字汝耕長安人正德進士知長子縣改任嘉善性簡直政令畫一堅持冰檠操人有饋遺輒峻拒之嘗指白

鏗謂左右曰此能亡身敗家爾等毋為所污時有生員朱愚上書陳其過即榜其書于縣門引以自責歷官布政司參議

陳大韶字舜舉嵩明人童時嘗道拾美珠飾俟其主還之侍父謁選京師父歿萬里歸櫬廬墓三年母喪廬墓如初事聞詔旌其門尋以選貢授訓導性淳篤言若不出口動以禮信自持人稱為毋欺先生在任七年致仕

嘉善章志

何天啟字義

吳志浙江通志俱作義

占貴溪人嘉靖進士由諫垣謫

丞遷令嘉善前此訟多停滯天啟至三日剖決無留勾

攝不遺隸卒民無騷擾值歲潦力請蠲免竟為當道所阻乃以贖鍰抵賦由是益得廉譽逾年陞南雄府同知于業字建公金壇人嘉靖進士知縣事性精敏猾吏不能為奸歲稔申請蠲貸邑無饑民為政敦大體延邑人陸邶郁天民重脩邑乘置學田旌節孝尤勤考課以振後學三載拜監察御史官至北畿督學使者以上吳志參嘉善章志蔡煥同安人由選貢任崑山訓導嘉靖癸卯應天解元署嘉善教諭操履廉靖嘗捐俸課士士非公服莫敢燕見所談惟經義史學諸生成畏慕之後以賢聞召為都察院司務歷官臨安知府

嘉善章志

陳道基字以忠晉江人同安籍嘉靖進士知縣事性簡易御下以寬凡訊囚期于開釋三年未嘗入一重辟遇豪猾重懲之不少貸故事日輪里長一人供役所費不貲道基酌一年公用之數計派有逋負鬻妻孥以償者輒為代補間有窮民困迫請借公用餘銀以自活道基隨數給之民亦無一負者又擇士聯文會躬為校閱三載擢御史歷官南京刑部尙書

嘉善章志
參吳志

賴恩字英華汀州人官百戶嘉靖甲寅倭寇猖獗總戎調兵于閩恩奉檄禦賊賊突至枵腹出戰斬獲甚多時他將各觀望自保恩以孤軍血戰為伏炮所中墮水死知

縣鄧植聞賊先遁餉絕眾兵入寺造飯賊縱火襲擊兵

大潰

嘉善章志

黃樞字翊卿南昌人嘉靖進士知縣事外嚴內明發奸摘伏法紀凜然邑大潦樞謁大吏免冠頓首請帑金以償賦尤留意里甲役法稱平猾書斂手秩滿陞南京刑部主事遷湖州知府卒于官

吳志

周宗字濟甫安福人嘉靖進士知縣事年少英敏剖決如流常以餘閒進諸生講藝又延名師啟書院擇士有志者漸摩之厚給廩餼暮年更任華亭歷官吏部侍郎

嘉善

章志參
吳志

許鎡字國器石屏人嘉靖進士知縣事務崇節儉公出不攜厨役私衙不然官燭署中隙地課僮僕種蔬自給時訪民間疾苦有著老董申洞悉徵糧利弊條陳均徭均賦數事鎡奇之請于巡按龐尙鵬奏行其議立條鞭法著爲令甲雇素嚴峻羣屬莫敢仰視鎡獨慷慨論議不激不阿審錄時見笞囚太重顧謂羣隸曰吾民窘無以賂若若無重傷吾民淚且霑霑下龐目之嘆曰是真民之父母也考績北行不能具舟車之費至京拜御史轉

僉事

嘉善章志

蔡懋昭上海縣舉人嘉靖年來任教諭時前令以貪敗訐

之監司歸咎諸生欲嚴繩以法士亦切切不平懋昭至開諭約束之詳立規條俾有遵守凡事涉學校者與邑令婉商處以公平於是上下相安又增學田購書籍脩祭器學校之中彬彬有禮稱極盛焉

去思碑新補纂

陳文彬字仲則以舉人隆慶年任邑教諭訓士有則愛卹

寒峻爲政尤先大體性廉潔與蔡謝相先後一時稱良

師焉以擢知和平縣去

去思碑新補纂

謝願字伯已別號暘谿江甯人嘉靖年以貢生任訓導初受學於呂涇野柵呂作四書因問載謝說居多通春秋以道自任講學訓士多有程式去官之日行李蕭然

去思

碑新
補纂

史朝鉉字貫之晉江人隆慶進士知縣事吏治明察胥吏屏息性方介莫敢干以私擢南科給事中遷湖州知府金和字元節長洲人萬曆進士知縣事性嚴峻持政縝密吏莫敢欺監司令下築圩和每鄉擇巨姓有行者董其事民不擾而功成至今賴之擢南兵部主事遷員外郎

以上吳志參
嘉善章志

胡彛簡會昌人由拔貢授主簿恂恂儒雅遵佐貳法惟謹且榜誓言於門以自鑒上官批發據理曉諭不事敲扑職司巡捕慮夜半邏卒倦卧每乘墉鳴鼓角發號以警之時鄰府脫囚輒設法捕獲御史上其廉能擢長樂知縣官至僉事

趙世顯字仁甫侯官人舉人署訓導丰采凝峻好與諸生講論書法得晉人風骨尤工于詩所著有楚遊蜀遊武

塘諸稿登萬曆癸未進士以上嘉善章志

章士雅字循之吳縣人萬曆進士知縣事蒞任後吏無軌法延邑人盛唐袁黃重修邑乘營葺學校公署不勞民力六載陞禮部主事

謝應祥字鳳皋安福人萬曆進士知縣事嚴正有威邑向無定役貧富不均應祥乃立照田起役法豪右不能漏

稅民德之考試童子拔魏大中冠軍秩滿召拜御史歷
都察院左都御史

林先春字狷庵閩縣

吳志作
侯官

人天啟進士知縣事恬澹無

欲風采凝然時民間投獻成習先春痛懲之弊始衰息

魏忠節斃詔獄追鍤先春力為斡旋恤死庇生靡所不

至愛士尤篤有巘山課業丁外艱歸教授生徒四十餘

年

蔡鵬霄字培自晉江人崇禎進士知縣事詢求民隱以興

利除弊為已任憫糧役繁苦博采眾議設法均之學宮

傾圮以時脩葺丁艱去服闋擢御史官至太僕寺少卿

李陳玉字謙菴吉水人崇禎進士知縣事甫下車漕兌紛

呶旗弁勒索加橫陳玉執持甚力得復舊規覽邑形勢

購地築鶴湖書院建鳴鶴樓于縣治後請增科舉入學

額接見諸生以經義治事相勉且勸讀史漢大學衍義

聘己卯分校得士七人俱有才名所著退思堂集離騷

箋註易書詩經解行世秩滿陞禮部主事

以上嘉
善楊志

國朝

劉肅之字欽中安陽人舉人知縣事順治二年邑初定餘

寇未殄撫綏安集以慈惠稱陞刑部主事歷官溫州知

府

嘉善楊志
參吳志

莫大勳字魯巖宜興人順治進士康熙八年知縣事蒞任初縣丞李婪橫大勳以嚴正待之懾不敢動御下不假顏色胥隸皆股慄退聽撫民寬和待士有禮居清丈平役均賦實行官收官兌法上官嘉之頒行通省以為例在任七載清介之守始終不易舉卓異不能治裝士民感恩輸助父老扶筇攀卧三十里臨別灑泣猶惓惓以虛糧未盡去蕩糧未盡清三歎息焉考選擢給事中

江浙

通志參吳志

闕振字翼公永定人舉人康熙丙午知縣事清剔逋賦識拔名流以讒陷免官

楊廉字澹庵遼陽人以恩廕授知縣性剛果不畏強禦脩築北鄉陞岸農人賴之邑志自章令士雅纂脩後八十餘年散佚無稽前莫令大勳甫事整輯即內陞去廉敦聘紳士重脩刊刻燦然有章在任三載餘以呈誤去任雲蛟字澹庵蕭山人順治舉人康熙丙午任教諭每月課文品題甲乙不稍假借釁序傾圮謀于紳士鳩工脩葺葺堂廡聿新在任十年卒

盧燦字孟輝奉天海州人康熙壬子授邑丞遇事敏幹而持以鎮靜擢龍游令

邵廷章字于會建德人康熙舉人授教諭課士一歲數舉

加意教育刻有魏塘課義三集遇歲科案發其新生之貧者槩不受費兩次增葺黌宮後陞四川琪縣知縣

崔維華字西巖奉天人知縣事服官勤慎詳革塘長重築圩岸均有利於民續脩丁巳以後七年邑志維華父原任湖廣藩司錢糧未楚奉檄核算解任去

盧宜字公弼定海人康熙舉人由蕭山教諭調補學問淵深勤于著述教士寬嚴有法陞貴州鎮遠令

李之藻字辰銘武定州人兄文襄公之芳總制兩浙值耿逆之變之藻隨任行間効力有能名後知縣事嚴明剛介喜訟者俱斂跡之藻念民力惟艱三月開徵農忙畢

後始摘催一二革除漕糧私派飭束旗丁肆橫督濬城河淺隘禮士崇文政教悉舉三載丁內艱去

閔元賞字紫階烏程人康熙舉人任教諭性和厚教士誠懇勤于課試刻有鶴湖會藝四集倡脩學校在任十八年與司訓趙汝旭趙天吉寅恭盡職卒于官

于舜枚字叶虞金壇人以副貢知縣事仁恕明敏精于剖斷省差不擾澄剔舊逋分十限以紓民力脩復思賢書院與士子虛懷講學刻有會課文二集詩賦一集一時文風斐然以註誤去

李夢昂字震爲江都人康熙進士選庶常改授知縣性端

疑操守清潔念畝糧攤賠貽累力持正疆歸額之議丁
內艱去後官至貴州鎮遠守

康珪字輯瑞滎澤人由廕生爲邑丞循謹自飭不輕受民
一詞每委理民訟必勸令解釋康熙乙酉

御舟由松入澗道經嘉善當事議毀三官堂橋以待珪謂橋
高無碍力持獲免在任十七年卒貧無以歸知縣梁文
燧捐助百金返葬

沈雲鴻字又京杭州人康熙舉人任教諭課士甚嚴與人
交敦古道以學宮傾圮商之邑長紳士重爲脩葺并更
新署舍議重建文昌閣未果陞嚴州教授所刻山石堂

會業暨司訓沈紹曾評選武水月課文並行於世

邵煜字夢陽登封人康熙舉人知縣事勤慎明敏革浮糧
清漕弊嚴緝盜賊昭雪冤誣期年獄訟鮮少以其餘力
興利脩廢若城垣樓櫓壇壝祠宇倉廩官廨及義學義
塚河渠圩岸橋梁之屬公私賴焉性孝友且嗜學公暇
輒研究周易性理孝經每校士親加評隲列前茅者多
獲售一時稱盛陞中書科中書

周宗達字重章山西山陰人任主簿居官勤慎聽斷明允
尤篤于寅誼助康丞之喪恤王丞之孤人咸稱之後陞
任黔中紳士餞別賦詩有留惠集

楊繩祖字景西山西籍江南山陽人康熙舉人由冀州牧
改任嘉善銳精圖治寬猛得宜重構倉廳擴脩忠義孝
弟祠殷懷禮士常捐俸資其膏火逋租佔種者分別懲
儆議歸復嵌田續脩邑乘葺梅花道人墓復建亞聖祠

俱未果期年病卒

以上嘉善志

張鏞字東序無錫人康熙進士雍正元年知縣事爲人寧
靜恂恂儒雅以振興文教爲己任脩思賢書院厚給膏
火集邑中俊秀肄業其中以左遷去士民懷之

李天桂字馥山大興人貢生知縣事有惠政縣收漕會久
雨米色腐爛坐罷職行治罪矣天桂詣城隍廟仰天呼

曰嘉善十萬漕我自問無顆粒入己乃令死于此乎士
民觀者皆爲感動有某氏子前曰公勿憂我等當復完
耳一夕遍傳邨市三日復得米三千餘石輸未畢啟前
厥貯視之則數寸以下皆精粒也旋以課完予復職
戈鳴岐字桐園景州人以舉人任嘉興令卓異候陞旋補
嘉善令續修縣志時稱循吏焉

羅緒字天根閬中人舉人雍正十一年由昌化令署嘉善
縣事操守清慎聽獄明允民有構訟者緒呼兩造至案
前委曲開諭民咸悅服數月之後案牘日稀嘗勸義塾
以教民學先時楊廉戈鳴岐纂志未竟緒延邑中紳士

續成之以註誤去邑人作詩送之名慈航集

張聖訓字杏傳奉天鑲白旗人雍正進士乾隆元年以翰林改授知縣聽訟明決庭無留獄嘉善賦額視六邑較重而旗丁積蠹更抑勒爲奸聖訓廉知其弊因令各厥削竹編字號民自探籌得某厥卽持而從之槩而溢累忝者立加之罰胥吏皆懾息莫敢恣肆建魏塘書院集士之秀者課以文藝親定甲乙凡勞農弭盜皆實力奉行其循聲遺愛至今邑人猶傳誦之

陳以剛字燭門天長人康熙進士乾隆三年蒞任爲人強毅愛民重士尤長于斷獄有以奴倍主者勢張甚以剛執而鞠之伏其辜隣邑有殺人者獄久不具大吏檄以剛往一訊卽得又較正市斛使歸畫一懋遷者咸賴其利因號曰天長斛工詩善書文學政事兼而有之

陶學楠南城人乾隆九年由儒士授邑尉緝盜安民勤于職守時拐黨肆毒有受其重賂者力護之學楠盡法嚴懲搜拔根株當時有陶青天之名至今稱幹吏必推陶尉云

饒萬鑑長沙人貢生乾隆十一年知縣事性廉介政尙簡靜不事鞭扑時嘉禾六邑皆患螟災獨嘉善有秋民咸德之在任一年以引年去士民賦詩餞別名其集曰武

水清音

梁徽字慎五介休人舉人乾隆二十二年知縣事召邑中父老詢以利弊武塘東連松泖西接秀水水鄉寥闊時有剽竊徽嚴飭捕保力行保甲法捐俸招募技勇協同巡緝萑苻戢影民得安居又以西北二鄉地形窪下每遇秋霖傷稼徽令于農隙時高築圩岸以禦水患他若崇學校釐漕弊置義塚以及育嬰堂同善會凡有益于民者莫不盡心籌畫調錢塘終杭州東海防同知孫震奉天正紅旗人舉人乾隆三十一年知縣事居心仁厚愛民如子有孫佛子之稱蒞任半載以越獄去官士

民咸惜之

周樽字眉亭昆明人乾隆舉人知縣事性剛直不畏強禦有蠹吏稔惡不悅樽婉諭之曰若所爲吾盡知之今貸爾罪後有犯無赦吏涕泣悔悟終樽之任皆奉法惟謹以卓異擢本郡通判歷官安徽布政使

諸克任字伊人號虛白錢塘人乾隆丙辰舉人壬戌明通博聞強記處事明練歷佐大府幕丁亥補教諭兼掌魏塘書院悉心講貫爲人和厚所作詩文清麗有骨後陞寧波府教授

孫奇字國珍三河人以吏員授主簿分駐風涇鎮鎮與松

江婁縣接壤作奸者每藉鄰境為逋藪奇擒治不少貸
操守廉介卒于官

邵于柟字學庵富陽人以歲貢選訓導學問淵雅尤長于
詩時邑多火葬者于柟作詩勸之俗為之變在任六年

引疾去

以上伊志

倪象占號九山象山優貢任嘉善訓導以善教稱

于志

黃浩字畫峯江蘇人嘉慶道光間任楓涇主簿凡遇家有
老親貧不能餬口而以索詐訴者則勸被告稍周之不
聽則出已錢千文使為小貿易以養親因而感激從善
者甚眾以老病乞歸民有追送不舍者

于志

萬相賓字觀亭江西德化縣舉人乾隆乙卯大挑以知縣
服官浙省嘉慶元年任嘉善縣修學校浚台沙堵二壩
設義園輯志乘在任五年屢辦清漕一塵不染安民息
訟案牘無留猶其餘事同治九年十二年邑紳周士鏜
等先後稟請入告祀名宦祠光緒元年奉部議以胞姪

萬青藜現任禮部尚書例應迴避存記

新纂

惲敷江蘇陽和縣舉人道光二年任嘉善縣時當災賑設
立粥廠撈救屍棺所定賑濟章程盡善無弊是年冬別
縣有以晚稻布種尚可開倉減征者惟公堅請停止以
蘇民困災黎感激尤甚又興修水利濬華亭塘捐俸建

張涇滙大橋他如平聽訟絕苞苴禁鬪喪重考課惠政

尤多光緒元年入祀嘉善縣名宦祠

新纂

孫步康會稽人廩貢生博通經史尤邃於易性廉潔愛士

道光癸未冬攝篆訓導甫受事以育材興教為己任遂

傳柬招諸生勗以士先器識而後文藝值歲饑分俸以

贍貧士月課見有才堪造就時賜酒食勤施講解感動

士林邑人陳言有送歸序

新纂

汪能肅山陰人嘉慶戊辰以廣西籍領解改歸原籍道光

九年任教諭居官清介善鑒金石訓士務在德化博學

好古著有魏塘人物攷休休壺山魏塘詩古文等集二

十一年卒於官貧不能歸遂葬嘉善多士思其遺教俾

其孫入籍應試

新纂

張錫戊蕭山縣舉人道光二十九年任教諭課士以嚴優

卹備至學中季考月課久為具文錫戊力整飭之又捐

俸獎賞並置田若干畝

見學田額數條內

為季考膏火多士始

知向學尊師考課無曠咸豐八年以母病去職

李楨號碩亭奉天甯遠州人道光年任楓涇主簿南有金

帝廟僧文海以浮屠射利年久屍皆暴露楨延紳瘞埋

涇有同善會經理吳姓因貲緇幾廢弛楨延郁道銘董

其事酌定條規事垂久遊

新纂

徐廣緒字子容海州沐陽人道光年任主簿廉平簡易人心悅服有大姓控佃欠租佃年甫十五號泣不已廣緒憐之予錢使償業主歲丁未鄉里惑妖言奉芙蓉灣石人為大仙祈禱雲集奸民因以為利嚴禁之并撻其石鄉愚始悟而散工詩善畫平時以筆墨自娛新纂

張學廣號麓田直隸人咸豐間任主簿廉靜狷介好士愛民工繪花果為時珍重咸豐辛酉以俸滿赴省驗看杭

城陷不屈自縊死新纂

海鹽縣

漢

案海鹽圖經謂海鹽令長秦先漢無考以東漢為始又謂前志載漢令蘇章蓋據後漢書蘇章傳嘗為武原長也不知武原是鄉未嘗為縣惟彭城有武原縣豈得謂是茲土乎舊志名宦蘇章傳今刪

白沃史君順帝永建二年令也初縣治在武原鄉陷為當湖君乘馬走指得湖東北一角遂不沒民建廟祀之海鹽

圖經

吳

步騭字子山臨淮淮陰人孫權召為主記除海鹽長性寬雅博研道藝訓齊風俗後代陸遜為丞相三國志本傳參吳志

葛公失其名丹陽人有經國才仕吳歷宰海鹽及臨安山陰後封吳壽縣侯抱朴子

晉

鮑陋隆安中為縣令會稽賊孫恩攻縣陋禦之恩走復遣子嗣之以兵一千為劉裕前鋒追恩裕慮吳人不習戰命居後嗣之竟前戰死陋終益州刺史劉志

虞潭吳國內史軍荒之後脩滬瀆壘以備海沙百姓賴之

袁山松吳國內史孫恩作亂山松築滬瀆壘緣海備之後

為恩所攻陷被害

以上海鹽圖經江東北六十里舊海鹽東北境

案滬瀆在今松江

祖撫海鹽令有集三卷

隋書經籍志

按海鹽圖經誤作梁人有集三十卷吳志又誤作隋

南北朝

虞邱進字豫之邾人從宋武帝征孫恩破賊張驃追至海

鹽故治頻戰有功

海鹽圖經

王孚瑯琊臨沂人為縣令泰始初天下叛亂孚以兵從巴

陵王休若討顧琛琛欲泛海走會稽孚邀擊之不得渡

官至司徒記室參軍

吳志

孔僉會稽人少師事何允三為五經博士遷尚書祠部郎

出為海鹽令

袁志

周顒字彥倫汝南安城人隱居鍾山應詔出為海鹽令孔

德璋作北山移文嘲之終國子博士

吳志

案本傳建元初顒為山陰令

呂向文選注作應
詔出為海鹽令

蕭特字世達齊高帝曾孫子雲之子官太子舍人出為海

鹽令

海鹽
圖經

劉霽字士湮平原人天監中為海鹽令以和理著稱

冊府元龜

徐份陵之子有父風解褐為秘書郎累遷太子洗馬出為

海鹽令甚有治績

陳書徐
儉傳

唐

劉長卿字文房河間人開元進士至德二年攝海鹽令終

隨州刺史長卿有攝令上節度李公詩云昔忝登龍首

能傷困驥鳴遂令辭短褐仍欲請長纓罷攝後還舊居

詩云累辱羣公薦頻霑一尉微去緣焚玉石來為采葑

菲州縣名何在漁樵事亦違讀此知長卿登第為尉後

以事貶廢復應李公浙西幕府辟為監察御史始承攝

縣之道也

姚南仲下邳人乾元初擢制科授太子校書右補闕出為

海鹽令觀察使韓滉辟為推官歷尚書右僕射

以上海
鹽圖經

李諤字士恢長慶中令海鹽察俗利病引河流資灌漑開

古涇三百以禦水旱民至今利之嘗于西郊立望城館

張祐題之以詩

唐書地理志
參海鹽圖經

宋

黃郎中失其名海鹽圖經或云名道宋初賢令民立廟于州前祀之

何執中有重脩碑記吳志

魯宗道字貫之亳州人舉進士為海鹽令疏治東南舊港

口導海水至邑下人以為利號魯公浦官至參知政事

諡簡肅東都事略

石知一太平興國中以主簿攝縣始建儒學縣東翁緯為

之碑記蓋有功于文教者也

翁緯海鹽令初縣學建于烏夜逼近農田景德四年緯移

建于縣東自為記以上吳志

褚瑋嘉祐七年以屯田員外郎知縣事兼管勾鹽場騎都

尉遷廟學于縣南堂齋小學並新之吳志參海鹽圖經

李惟幾字幾道河內人嘉祐中為海鹽令時荐饑漕使元

絳行郡惟幾上書乞啟郡帑假官錢貸民糴種濬治溝

洫以備水旱又植木為閘及置鄉底堰三十餘所民賴

以稔柳志

范世京字延祖吳人文正公孫進士熙甯間令海鹽勸民

孝友力田治聲冠浙右趙圖記

何執中字伯通處州龍泉人進士高第判台亳二州元祐

二年知海鹽政識先務興學校築捍海隄置瀦水閘邑

人紀其十異五年遷太學博士官太宰吳志

喬大臨政和三年為縣令時朱勔以花石得幸浙江之西一花一石不問何人家朱氏蒼頭排闥而入以黃紙封之戒主人曰善護御前物蒼頭至海鹽入僧房將盡封其花石僧徒少拂其意即箠之訴于縣大臨命追逮杖十餘人朱勔誣劾之坐是罷免

柳志

朱良字良伯吳郡人仕海鹽尉時金人分兵入境良集射士百餘奮而前力不敵竟死事聞官其子

續文獻通考

丁安義紹興時為海鹽丞值歲旱詔復民租十之八而和糴尚未罷安義語令曰歲饑常賦且減不應復有和糴即上官怒安義請以身當之檄屢下抗論反覆卒賴以

免

浙江通志

徐光實字德充晉江人進士淳熙十三年為海鹽令好獎善類聞民行孝友即加褒異性慈愛歲旦縱囚歸省吏恐亡去囚輒如期至無敢脫者

蔣行簡字仲可永嘉人進士淳熙中知海鹽有聲後知處

州

以上袁志

邱耒字少潛常熟人紹興中知海鹽治學宮築海堤二十里民有宿逋檢縣藏得羨餘悉為代輸縣有疑獄一時

平反

嘉靖浙江通志

案題名記紹興中並無邱耒今

法喜寺碑亦同則是紹定而非紹興也當以金石刻為據

劉銓字全之樂清人進士隆興二年知縣事值水災請停

秋苗法勸富人助賑全活甚眾學舍久廢以圭租二百

斛倡修之王龜齡誌墓稱其政務循良惜在官不久云

吳志

李大卞乾道中為令縣境有常豐二閘歲久僅存其一

日就隳壞大卞重修以復其舊且置堰以通往來民便之

海鹽志

趙師石澈水志淳熙中澈浦監鎮知秀州趙善悉嘗薦之

於朝時黃洽為中丞以所親屬善悉善悉聞師石材而

未識面薦而後報曰宜以中丞所親為後洽大恚

趙善悉淳熙九年知秀州開濬海鹽宦塘增置鄉底堰以上

海鹽圖經

李直養字無害維揚人初為海鹽丞紹熙吳志元年薦知

縣事興修水利增置鄉底堰八十餘所重葢閘屋易閘

板自是農被其利又修大成殿置書籍祭服兼設小學

廨舍亭館無不葺繕為叢冢湯山撈溺海屍葬之歲以

數百計先是縣未有志自直養創成之浙江通志參吳志

施棐字徵晉紹熙四年為海鹽教諭植品修潔著有小學

吳志

陳仲微字致廣高安人嘉泰二年舉進士遷海鹽丞鄰邑

有疑獄十年不決郡首命仲微按之一問立決後拜殿

中侍御史宋史本傳

厲夢龍東陽人淳祐二年在鮑郎場司鹽歲大歉清苦檢

飭竭力奉公三年鹽課以足吳志

朱寢炎字叔明朱良曾孫寶祐初尉海鹽持論廉恕決獄

平允郡帥多屬以事劉志

汪元圭婺源人宋末嘗獻軍國十策特補承信郎茶院監

酒海鹽朱志案澈水志酒庫昔在興城後遷茶院去

酒興城一十二里後漕司庫官兼之是知茶院酒官即

元

顧泳汴人世祖至元二十一年知海鹽州值大旱禱祀陳

山雨立至築塘禦潮患名捍海塘卒于官貧不能還子

孫葬泳尚胥橋南遂家焉

邱世良字子正大德中教授海鹽嘗復學田楊載集有贈

邱子正之海鹽詩

呂德裕字文饒袁志單父人延祐中為海鹽教授初學田

萬畝餘俱被侵蠹德裕搜剔之以所入興修廟學德裕

處己以嚴行事有節時知州事趙孟貫賈禧先後有志

作興德裕亦卓然有成翰林陳旅書其績以為才可大

用云以上海鹽圖經

李仲彬至治三年知海鹽州甫下車時雨若禾黍成歌謠

載途又知州李蘭奚察邇見遠奸宄僉得其情又海砂

場鹽司丞抹速忽廉幹寡欲能潔其操亭民不煩三賢堂碑

記

趙孟貫字子唯黃巖人泰定時為海鹽知州有惠政民思

之

賈禧字吉甫宛邱人泰定時為海鹽知州能行之以正限

之以信羣佐若卑弟子老胥肅然奉之以上樂郊私語

葉彥中字大中松陽人至正時知州事才敏有風操累官

御史

陸德中失其名行省參知政事陳秀民有送德中赴海鹽

知州詩

陳某並其名字亦佚之正至二年任知州興學校作大成

樂範金為鐘及造琴瑟笙磬之屬集諸生三十二人肄

習之

范廉卿欒城人至正十八年以蔭補蘆瀝巡檢為人恂恂

儒者善騎射州瀕海亡命販私鹽擅利飛棹往來莫之

敢撻至是皆心懼廉卿境內毋敢私販者時推官陳春

以平反鹽獄百人見稱大僚以為使巡官人人如范何

必陳司理平反也

明

郭貞濟南人以吏員為典史奉職公勤有幹才洪武二十

三年知縣淡成奏保陞縣丞以上海鹽圖經

龐暉博興人進士建文二年知縣事祛刷吏弊深得民心

永樂元年應求賢舉陞工部郎中吳志

張佑金壇人建文四年任典史佐理公勤吏民畏服永樂

二年應求賢舉陞長樂縣丞海鹽圖經

畢瑗永樂五年知縣事築田圍一千六百四十民利之

吳復閩縣人永樂時以知印除海鹽簿聲績大著累官工

部侍郎以上吳志

袁惟善贛州人吏員為海鹽丞勤撫字平徭役民悅服之

永樂十二年坐事謫徒民具績訴于郡郡轉聞之朝下

所司覆實得復職海鹽圖經

上官廉南豐人舉人永樂十三年知海鹽縣公平正直和

易近民歿于官歸葬之日民有執紼號泣者海鹽朱志

陳諤字克忠番禺人舉人永樂初官給事中歷陞順天府

尹謫知海鹽著有政績後遷長史吳志

王端字宗正河間人監生正統十四年為海鹽令勤慎廉

平苞苴不行刑罰不濫景泰五年朝覲還卒于途聞者

莫不歎息浙江通志

郭禮蒲州人正統間任典史清儉介直蒞下有威民信服之

黃楚章豐城人歲貢生正統間授教諭設學規甚嚴與訓導鄭理劇協心誘迪士習一振

鄭理劇閩縣人舉人正統中授訓導以經義德行教諸生為體用之學士知嚮方焉

孫芳流陽人正統中授訓導以興起斯文為己任增置學舍與諸生日夜講授俱有程度絃誦之聲至曉不輟

莫震字霆威吳江人進士景泰七年補海鹽令任七月有威嚴吏民敬畏不敢干以私終延平府同知以上上海鹽圖經

周灝字秉純邵武人舉人成化三年知縣事往例里甲派馬價百金灝遣還之有積吏劉淵者以弄法致千金灝

案其奸徵收例有羨餘灝悉貯庫以充正數縣苦徭稅灝議捐賦之法遂減其徭之半在任三年清介如一日

擢松江府同知未赴卒邵武府志

楊克敬字宗禮真定人監生成化六年為海鹽令端重耿介懲豪右後以執法為奸者所誣民聲其冤卒不白

李雲字載章分宜人進士成化十年任濬澈川水道葺繕邑城稱能吏以上吳志

譚秀字聳秀江西龍泉人舉人成化中知海鹽縣先是海

塘修築役七邑民夫為陂陀形易圯秀僱役改築植椿
疊石稍殺其外以禦潮水自此無患嘉靖浙江通志

陳暹字序進莆田人舉人成化中教諭有儀範工詞翰修

葺縣志袁志

林榮字希袁志吳志仁閩縣人舉人成化中授教諭待諸生

以恩義有脫其妻簪珥為贄者固辭不受卒于官貧無
以殮張給諫甯謂榮貌與心同言與行皆君子也

陳良字秉善莆田人舉人成化中授教諭以蔡氏書教諸

生多所成就以上海鹽圖經

王璽字仲信廬陵人進士宏治十二年知海鹽新縣治興

廟學築塘捍海砥方石縱橫相制尤為得法人呼為龍

王廟前樣塘擢知德慶州浙江通志

李頎字文嘉考城人舉人宏治末知海鹽縣篤厚廉謹士

大夫號為長者

嵇綱字汝堅安東人舉人正德時自於潛令調海鹽蒞政

二年案無畱事獄無繫囚吏民懷服擢知湖州守以上吳志

辛九齡字希章袁志吳志蔚州人舉人正德時知縣事剛方

自負不私一錢海鹽圖經

朱實昌字士光高安人進士正德時知海鹽縣時官河堦

塞捐俸疏濬之在任三載召拜御史實昌長于吟咏其

試士詩有神駿畱奇骨干將有異光之句時傳誦之吳志

張濂字景周蘄州人進士正德中知海鹽縣蒞政三年民

歌之曰前堂無吏人後堂無優人堂下無犯人擢監察

御史浙江通志

呂湯民河東人案海鹽圖經浙江通志作南河人監生正德中為海鹽丞

事母至孝為政清平卒于官歸無行貲

劉桂字子芳黃岡人進士嘉靖初知海鹽縣洞察民隱不

妄施刑工古文校訂郡中先達遺集終合州知州以上吳志

張聽字鵠舉泰興人進士以諫武廟南巡廷杖罷官嘉靖

四年起補海鹽令為政得大體民困徵役聽至減十之

五陞湖州同知官至戶部侍郎民懷其德立解帶亭浙江通志參海鹽圖經

通志參海鹽圖經

夏浚字惟明玉山人進士嘉靖九年知海鹽縣英敏有學

識賦役多所調劑水鄉竈歸民後所授之蕩歲徵草價

納鹺司賠累不一浚乃改議蕩給濱竈價并歸民糧其

濱竈舊所免民田之耗悉徵之選雋茂講授經義正名

宦鄉賢祀典續修縣志人服其簡嚴海鹽圖經

董玲涇縣人進士嘉靖十二年知海鹽時海塘傾圮捐俸

修築又葺澈浦城上官獎勵之

張載陽字子春浮梁人舉人嘉靖二十九年知海鹽時多

流寇令鄉鎮植柵又選民之壯者晝夜巡禦邑遂無患

以上
吳志

童宗字德崇甌甯人嘉靖中授教諭性抗直善振作士氣
徐咸贈之詩有靜廉不作肥家計諄切期收造士功之
句

吳允隆江西人嘉靖間爲典史奉檄築捍海塘縱橫互制
有法屢經風潮不圯名曰典史樣塘

鄭茂字士元莆田人進士嘉靖三十二年知海鹽值倭亂
茂築城建敵臺集鄉勇晝夜守禦倭凡再薄邑城茂悉
力死守得無患時寇南穴石墩北穴柘林海鹽介其中

村落焚劫幾空茂弔死扶傷日不暇給而軍糧驛馬諸
費咸備無失後以秦駐塢之捷賜白金文綺擢兵科給
事中著有靖海紀畧

李茂南昌人吏員爲巡檢勤慎明敏尤精於射嘉靖癸丑
倭犯海鹽茂卽有牛橋之斬獲甲寅四月倭又猝至茂
佐鄭令備城守器具賊知有備去復守澈浦城悉力捍
禦城賴以全靖海紀畧稱其屢隨征剿氣壯而不懼

海鹽
圖經

何希周新甯人監生嘉靖時爲丞持身謹愿海塘圯壞希
周泣請當道修築陞許州判官

王宗載宗仲勉袁志吳志京山人嘉靖進士知縣事問民

疾苦省刑薄稅僉審徭役親自檢括里胥不能為奸濬

水利農不苦旱他如修海塘禁私鹽清覈軍匠查革虛

名兵餉精心悉慮暇與士子講藝多所成就云劉志

李薦佳字伯受潁州人進士嘉靖四十五年知縣事氣度

寬洪政尚簡易擢戶部郎吳志

鄭昊字祖欽順德人進士隆慶三年知縣事時築海塘親

往采石為文諭俗惻怛感人擢南戶部主事吳志參海鹽圖經

范梅字元春豐城人進士隆慶六年知縣事年甫十七明

察如老吏修築角里堤蓄水以憂去

盛德丹徒人歲貢生隆慶中授教諭端嚴寬恕士有冤抑

求達有司者必面拒而潛為之地終不使之知也以上海鹽

圖經

高梓字植修貴池人隆慶時訓導清學田徵逋租四百餘

石增置田一百畝時值土人周香聚黨為亂梓白于縣

捕獲之薦擢通判吳志

饒廷錫字文命進賢人進士萬曆三年知縣事政尚嚴肅

犯者罔貸時興役築塘身先百執程事以勞瘁卒祠海

上海鹽圖經

蔡逢時字應期甯國人進士萬曆中知縣事廉潔自持行

均田法以三百二十畝管一役又革坊廂丁田役立門

攤僱夫法邑咸稱平浙江通志

張汝翼景州人歲貢生萬曆時為丞性魯直一塵不染日

惟舖糜而已陞廣甯衛經歷

周之光湘潭人歲貢生萬曆中為丞管糧卻例金人頌之

陞漢陰知縣以上海鹽圖經

黃之俊字君顛清江人進士萬曆十五年知縣事温雅循

謹好恤窮民以劾去清貧自苦民多寃之海鹽圖經參吳志

謝吉卿字修之晉江人進士萬曆十七年知縣事時大饑

民多攘奪吉卿以鎮靜持之再築海塘有勞績海鹽圖經

王臨亨字止之袁志吳志崑山人進士萬曆二十年由西

安縣改知海鹽遇事精敏察獄不越宿縣城久圯加築

高廣海警無恐升杭州知府未任卒浙江通志

李當泰字元祉本姓俞泗州人進士萬曆二十二年知縣

事值編役限士紳免額謝鄰邑詭寄所徵賦稅悉以原

封發解耗羨無染歷官工部郎吳志

杜士全字道執上海人進士萬曆三十年自大冶縣調海

鹽性坦白嘗自謂吾作令于前官無一事更張于上官

無一事條陳獨服膺平易近民四字以為箴警然遇大

利害巽然不少動官至太常卿

漆元中新昌人舉人萬歷中以湘鄉令改教諭嚴取予敦氣節士有何有司謁廟請事者元中間之先揭其人于廟門使其自愧後署崇德以長揖漕使者遷教授勒致仕去

翁恆吉壽昌人萬歷中授訓導端方嚴毅有不屈之節陳柯當塗人萬歷中為典史歲乙亥開白洋新河築土塘督砌捍海石塘勞績甚多陞高安主簿

濮陽春字生府宣城人進士萬歷三十三年自上高縣調海鹽性真率與人無忤擢南刑部主事

喬拱璧字穀侯上海人進士萬歷三十六年知縣事時衛卒餉多冒濫嚴絕其弊清田額行貼役法築捍海塘增設漕糧倉廩吏廨及贅街葺堰民多賴之擢兵部郎上以

海鹽圖經

何杲

吳志海鹽圖經俱作早

字白夫懷甯人進士萬歷四十一年知

縣事初政尚嚴後濟以寬故民畏而見德市肆有門攤商稅報派不均杲核而差等之困大蘇行鹽票多至六千滯正引且累肩挑賠賒杲令減票二千鹽課以足擢

監察御史 浙江通志

樊維城字亢宗黃岡人萬歷進士知縣事徵賦令民自行投櫃省漕兌贈耗數千百石為孝子沈壽康立俎豆修

葺張給諫葉侍郎廬墓纂述縣圖經天啟中遷禮部主事

朱應熊字渭叟浮梁人進士崇禎五年知海鹽縣為政和平而吏民畏服陞兵部主事

國朝

郭尚信字誠之遼東人順治七年知海鹽縣治術詳明漕兌嚴禁旗軍額外科索以白糧註誤人皆惜之以上海鹽續圖經

毛一駿字槐眉竟陵人舉人順治十二年知縣事性仁厚愛民好士尤邃於經學修築城垣監築海塘有殊功吳志

潘宏仁歸安人舉人順治十三年授教諭學問純粹持已接士皆出于至誠署縣篆清慎著聲陞紹興教授

雷騰龍字化明三原人拔貢生順治十七年知海鹽縣十八年奏銷抗糧一案先期清算紳衿無錙銖欠各縣呈累甚多人咸服其先見

湯其升字日峯南豐人進士康熙五年知縣事建縣治大門及更鼓樓盡復舊觀

楊宏仁字蒼霞永安人歲貢生康熙初授海鹽主簿為人質直不撓以南糧負債自戕民多哀之

黃學孝字衷赤大興人吏員康熙間授海鹽主簿頗著勞

續卒于官見漕兌碑記

以上海鹽續圖經

張素仁字靜公遼東人廕生康熙九年知海鹽縣催科力行滾單不事敲扑漕糧盡革陋規實心造士以興文教

修築海塘發粟賑饑士民尸祝之

浙江通志

董佩笈字時瀛武進人進士康熙二十八年知縣事居心仁厚厯官川東觀察使子伸傳以先人遺愛所在遂家於海鹽

李鍵字梅墅漢軍正黃旗人監生康熙二十九年知縣事吏才明敏搏擊頑梗不遺餘力陞綏德州知州

梁澤字采山順德人舉人康熙五十七年知海鹽縣力革

諸役當官自給雇值莊田用順莊法民稱其便喜談藝創觀成書院於西門外

王仕正字亦清漢軍監生雍正二年知海鹽縣政尙嚴明獄訟衰息在任十年士民懷之

王紱字子文河南人舉人乾隆四年知縣事未及一載卒于官遺孤世林世櫨生母汪誓守撫之邑人感公多善政請于上官撥育嬰堂東北隅以居兼助養殮資世櫨以寄籍爲諸生

周宣猷字雪舫長沙人進士乾隆六年由桐廬令調海鹽操守廉潔才具明敏不畏強禦作興文教捐資創修邑

志人尤以爲功之偉者

王如珪字桐叔宛平人歲貢生乾隆八年由仙居令調海鹽踵前令周續成邑志俾六十年來文獻有徵如珪力

也以上海鹽續圖經

王錫位貴州人舉人乾隆二十年任鮑郎場大使居官務以德化濱海竈戶相戒勿爲私販歲旱禱雨錫位徒步三里許不以爲勞民居失火叩頭祈禱頭額俱腫解組日囊橐蕭然商民醵金贖以歸

陳愷字藹堂融縣人舉人乾隆二十四年知海鹽縣明于折獄不妄責一人善堪輿治南有高阜愷以爲百里內秀氣所鍾捐廉建奎文閣以鎮之縣之科第綿延亦愷之澤也

王序端字可堂漢軍舉人乾隆癸未任鮑郎場大使奉委撥商捐公銀開濬沿塘新河頗著勞績工詩詞楷法時集士人爲詩文會秩滿擢廣西知縣

陳士琬字月巖仁和人舉人乾隆二十六年授教諭崇尚氣節見有司無諛色月課諸生每卷必爲芟改時有結文社課藝者就士琬正之士琬集諸明倫堂左側課以文一詩一約本日交卷不許攜歸私齋在任六載致仕去

韓本晉字望川陽曲人進士由秀水調知海鹽爲人厚重政尙甯靜海甯陳氏改毀澈浦孫家堰張老人闢與澈浦士民糾訟不已本晉請於大吏得復舊制嘗奉檄委勘孝豐疑獄衆山之中肩輿不能達乃徒步至其處集諸犯于庭虛衷研鞫寃者咸得雪嗜讀書所在多惠政有古循吏風民至今思之

張九華字蓮洲號雨亭直隸人舉人乾隆四十四年由景甯縣調海鹽性長厚操守廉潔邑多徭役派及編戶九華捐俸任之不以一錢累民歲遇秋試擇一邑能文之士贈之金以助行貲在任二載深得士民心後以疾卒

于官妾汪氏殉節詳列女傳

吳焯乾隆四十九年署鮑郎場大使時東團場及西海場俱開濬築修焯與澈浦紳士親督工程不辭勞瘁奉檄調任復畱澈浦以俟工竣至今利賴之

以上伊志

鮑鳴鳳安徽人令海鹽甫下車相度水利鳩工開濬永安湖并修築湖堤閘座疏理中河支浜戴星出入經畫詳明去之後澈人戴其德爲立鮑公亭

于志

張宗軾字柳溪湖北嘉魚舉人令海鹽愛民如子任鹽十三年咨訪利病興革得宜未嘗獵取能聲卒於官邑人思其德不衰

于志

楊國翰字丹山滇南進士為海鹽合創修明倫堂蔚文書

院育嬰堂百廢具舉為政寬嚴並濟以實心行實事禁

火葬捐義塚嘗慕魯叅政風為葺其祠于志

張力行字顧堂湘潭監生乾隆四十年任知縣如意人材

創立蔚文書院酌經費定章程克垂久遠四十四年調

任平湖邑人朱丕烈為撰德政碑新纂

汪仲洋字少海成都舉人道光元年任知縣時議修築海

塘悉心經畫築塘八十餘丈工程堅固稱為汪公塘刻

有塘工成案築法甚詳公餘賦詩有海壖唱和詩六卷

新纂

來清曙字新齋蕭山舉人道光八年任訓導儉約自持秉

鐸二十載悉心教導邑中能文士登科第者皆出門牆

新纂

楊鶴鳴字琴友侯官舉人道光十八年署知縣政尚寬平

民初犯法剴諭使自新再犯乃嚴懲甄拔書院肄業生

按月集署中督課捐廉給獎文風一振新纂

王瑩字瑟園鄞縣舉人道光十八年任海鹽教諭積學淵

博時太守于尚齡修郡志瑩任分纂收訪遺書採擇確

新纂

陳祥熾字椒堂諸暨人舉人道光二十二年任教諭整頓

士習按月課藝歷年不替助祭諸生有衣冠不整者嚴飭之採訪節孝二千餘人詳請旌表己酉襄辦賑務能得人心新纂

段光清字鏡湖宿松人舉人道光二十九年署知縣勤吏事日坐堂皇有控訴者立訊或循行巷陌訪察民情訟棍蠹役訪獲重懲人呼為段青天時值水災廣勸助賑重治乘災搶奪者境內帖然歷官浙江按察使新纂

趙濟川字小溪合肥人同治二年冬蘇軍援浙收復縣城濟川奉委暫署縣篆時降眾頗桀驁駕馭無敢梗令匪類或壞民居捕治不稍貸地方賴以安謐新纂

王彬號叔雅福建閩縣人解元同治十三年任海鹽請濬白洋河並修澈浦永安河堤閘倡修縣志整飭書院士民感之新纂

平湖縣

明

徐韶豐城人監生正統甲子知縣事工部尙書石璞奏韶罷軟不能任事去官景泰庚午部民保韶廉勤有爲鎮守副都御史軒輓以聞遂復任

李翥東光人監生成化間知縣事時周家涇并獨山海塘衝塌鹹水浸入民田翥奏乞將在官折贖納米銀計工修築從之

以上平湖程志

梅清字本潔大足人監生成化間任管糧丞衣粗食糲一介不苟催徵餘日佐其長以廣教化大吏知其廉毅檄

按他邑疑獄多明允檄董海塘勸勞有方工速而固樂

近文士不廢吟咏九載考滿乞歸祀名宦柳志參平湖朱志

郝文傑字士英陽曲人舉人成化中知縣事為政勤激勸

擇三老子弟中孝弟篤行者獎勵之里閭有不軌及胥

吏翫法咸裁以律遷知高郵州

林光字緝熙東莞人成化舉人以會試乙榜授教諭光生

而清癯好學不倦師事陳獻章築室欖山往來問學者

二十年巡按朱英勸之仕光以書報之尋以母強之出

上敦教化養廉恥疏言甚懇切巡視彭紹廉其賢待以

賓師禮丙午主考福建宏治己酉又主湖廣試是年總

修浙藩憲廟實錄辛亥修嘉興府志壬子同考順天凡

三校文多得名士陞兗州府教授祀名宦以上劉志參平湖程志

熊卓字士吳志作志誤選豐城人宏治進士知縣事剛毅明敏

權貴無敢撓之尤廉潔自守為時良吏擢御史祀名宦

趙圖記

郭天錫字福山登州人舉人正德末知縣事清謹有惠愛

不阿上官風力甚著遷知徐州趙圖記參平湖程志

周仕字用賓廬陵人嘉靖進士知縣事剛正嚴明介然有

守詞無妄受以是少訟尤重學校母終於署徒步哀號

觀者咸為墮淚後令句容陞工部主事祀名宦劉志參平湖朱

志

黎循典字成五華容人嘉靖甲午由舉人知縣事興學校

省刑罰均徭稅催科不擾和易近民擢御史

劉志

戴鍊字成之婺源人舉人嘉靖中任教諭有文學聲以古

道率人崇尙志節生徒貧而好學者分俸賙之捐貲以

葺學廨陞知甯州

趙圖記

蔡鳳字九苞南昌人吏員嘉靖中爲縣丞任事果敢篤實

絕無矯激近名之私秩滿乞休

趙圖記參平湖程志

張煌字用韜福建南安人進士嘉靖己亥知縣事爲政務

篤實不用矯激邑中刁黠噤不敢動訟者得一言輒解

去陞工部主事

平湖程志

陳朝紀號石亭南海人貢生嘉靖中由歙縣訓導遷教諭

直己守道終始一節工詩嘗有天下可人惟雪色客中

知己只梅花之句歲祲捐俸周諸生急老而致仕門人

爲刻冷香畱稿以志去思

劉志參平湖程志

曾曙字暘谷全州人舉人嘉靖甲辰知縣事性介不妄取

與剔蠹除奸與民休息是歲秋大饑殍殣相望曙力請

大吏出粟賑之廣設粥廠以食飢者會催科甚急毅然

曰吾官可罷民不可毒有逋稅者咸使歸業弗之繫民

免轉徙竟以緩徵罷去泣送者數千人祀名宦

李僑字仙臺長清人嘉靖進士知縣事立法尚嚴明先是

田不均輕重失實僑始為均之民稅得舒以上平湖程志

楊挺高字叔謙金鄉人進士嘉靖二十九年知縣事性狷

介袍履皆布素署中機杼聲達宵晝入覲時贊儀惟粗

布兩疋家人紡紉物也署後有隙地種蔬自給以餘蔬

饋士大夫曰不可一日不知此味排里供費一切裁省

在任三年冰檠之聲聞於遠近祀名宦劉志參平湖程志

喬登字子高延津人吏員任典史嘉靖癸丑倭寇至登奉

檄禦於邑東南之曹家橋所將民兵猝見敵皆望風逃

竄登奮身不顧率其子戰歿於陣祀報功及名宦平湖程志

殷廷蘭廣東人嘉靖進士授嘉興推官署縣事倭猝至僅

隔一水時未有城令民無走當為疑兵以卻賊於是晝

則揚兵夜則列炬舟側市人聲應若十萬師賊駭遁百

姓歡呼相賀廷蘭曰是倖也不可以再亟申請築城以

守經畫措置盡得其宜祀報功祠劉志互見府名宦

胡松字茂卿績溪人正德進士嘉興推官繼殷廷蘭後署

縣事時議築城詣幕府曰民難與慮始請縛松置軍前

民愛松必相急乃可舉事從之不閱月城成累官工部

尚書吳志

劉存義字質夫襄陽人嘉靖進士三十三年知縣事時邑

嘉興府志 卷四十三
受倭患尤劇始議城守存義至負土築埤埤成而倭至
雉堞屹然倭不能上悉力來攻存義申號令明賞罰擐
甲援枹立矢石下倭見堅守遣酋至城下裸衣跳罵欲
激戰手弓射之應弦而倒倭解圍去總督胡宗憲率師
數萬屯城中土漢交雜供費億計存義盡心調護卒以
用間殲賊沈莊倭既平亂兵慘甚於倭存義百方撫戢
邑賴以全民爲立報功祠并祀名宦 平湖程志
顧廷對字子俞泰州人嘉靖進士知縣事遇事敢爲辨疑
獄洞得其情先是較田多寡以役民民以田爲仇廷對
創條鞭均徭法總計而年徵之貲於官以貼役者力均

而不病上官初弗之許廷對反覆陳利害十數條始得
如請令下民若更生逾年南海龐尙鵬按浙頒其制行
之各郡邑所在稱便擢御史祀名宦 一統志參平湖程志
法暲字雙嶼丹徒人縣自建治後百餘年未有志嘉靖癸
亥暲任教諭慨然以文獻爲己責博採省志府志摭拾
稗官家乘閱三月書成時稱詳核 吳志參平湖朱志
丁應賓龍陽人嘉靖進士知縣事務簡靜恤民養士前知
縣顧廷對立條鞭法法行浙中各郡邑他邑或稍更張
弊復滋應賓一遵約束邑人賴之 劉志參平湖朱志
趙書字同文桐城人歲貢生嘉靖末任訓導 案劉志作勤教諭誤

課士諸生餽遺卻弗受其甚貧乏者至典衣以周之嘗作明倫十二事以訓士士有篤行誼者輒稱舉以為儀表學道聞而褒賚之即以此所賚鑄鼎學宮為銘以見志

陞遂昌教諭

劉志參平湖程志

李實字若虛瀘州人隆慶進士知縣事究心民隱搜剔吏蠹獄訟日減諸役無所事事多散去乙亥夏海溢害稼實周視賑恤安集數千人邑有把持稅牘積蠹其中者洞燭之毫不敢隱僉徭煩簡各以力任民咸便之祀名宦

劉志

劉士瑗字允王安福人萬曆進士知縣事性穎絕凡訟牒

文移一覽不忘學宮災捐俸為倡不旬日告成監司議

開金山渠士瑗慮海潮延入內地為民患以去就爭之

乃寢陞刑部主事祀名宦

平湖程志參袁志

洪敷文號質所臨桂人解元萬曆己卯署教諭容貌修偉

為人寬綽大度待諸生有體陞黟縣知縣祀名宦

程志

江環字晉雲漳浦人進士萬曆丁亥知縣事是年大水秋

無收越戊子己丑歲頻旱大疫殭屍載道環盡心賑恤

平糶設粥市棺瘞死者又力請上官緩本年催科至以

額虧受詘處之泰然在任不輕動官庫一錢自奉尤淡

泊即鮮食亦不恆設云

黃焰字明寰商城人萬歷進士知縣事性愷悌不事筮楚

奸蠹自戢恐差役擾民削木為隸以代追呼民便之案

無畱牘非大獄一聽自息以勞瘁卒于官

以上平湖程志

王義

案浙江通志作義

民字若惺江陰人萬歷進士知縣事聰敏

洞察民有犯至庭一見不忘每晨視事輒言昨日某人

行某事今在某地跡之不爽胥吏敬憚之徵糧僉役曲

盡規畫以竹籤註姓名糧額遞催完賦猾吏無所容奸

以憂歸

袁志參平湖朱志

林維暹字用顯晉江人舉人萬歷辛丑署教諭事林本閩

中大族諸父兄多居顯要維暹清風挺節淡泊自甘簡

諸生十人旦夕論文先後登第者六人知縣王義民雅

敬之為建鳳翥軒

平湖程志

蕭鳴甲字象林

案浙江通志作爾先

漢陽人萬歷進士知縣事廉明

不煩苛兩造盈庭片言折之各唯唯去歲戊申霖雨浹

旬旁邑預訪富室待賑中人之產無甯居鳴甲歎曰荒

未及民先瘠矣下令云賑在官毋需民也一邑安堵竟

亦有秋每造士大夫問民疾苦坦衷洞達至於事所不

可即上官無以易也政暇葺弄珠樓形家言大魁兆此

遷戶部主事

平湖朱志

朱欽相字懋忠臨川人萬歷進士知縣事值編審剔釐飛

灑虛糧花分詭寄之弊設官圖立頑甲卻公費永著為

例修城之費舊設里甲吏得緣以為奸欽相請派八條

鞭凡所興除皆務便民癸丑以母憂去初欽相父邦喜

為府同知再署縣事有善政欽相繼之邑人為立世德

祠後擢吏科給事中祀名宦舊浙江通志參平湖朱志

張蔚然字維誠一作成仁和人舉人考碑記核正萬厯間教諭博

極羣書與士子講學不輟邑令縉紳咸就教又清學基

廣科額增置書籍勸學職題名碑案碑今積缺任俸百

兩議建尊經閣著有湖巒政槩

羅尚忠字孝可青陽人萬厯進士知縣事為政清簡執法

不撓北白南糧陋規洗刷殆盡禁火葬廣置義塚又捐

俸立義田慮民舟苦於供役為置官船代之在任不滿

三載以憂去後擢戶科給事中祀名宦

張賡晉江人舉人萬厯間署教諭樸茂肫懇不事矯飾卻

修脯絕餽遺同寅貧不能給者分俸周之以憂去弔賻

悉謝不受歸橐蕭然以上平湖程志

陳鴻烈六合人歲貢生萬厯末任督糧丞仁厚清介卻常

例不受私謁令有事檄下必力持公道好文博學温然

有儒者風平湖朱志

陳熙昌字杲庵案浙江通志作景庵南海人萬厯進士知縣事蒞任

六年未嘗妄撻一人士民干法輒霽顏諭之捐羨金貸贖緩寬徭賦減貼役編審最稱弊藪熙昌先清官戶實田照例優免以溢額者充役不及額而取寄莊以漁利者盡數還民役田遂溢四萬二千有奇歲歉穀貴平糶賑恤境內帖然擢吏科給事中祀名宦

魏俊麟遊人選貢生萬歷間任督糧丞清謹慈祥重道義好文學任未期冒炎督兌中暑而歿署橐蕭然邑令與鄉先生懇大吏給勘合始得以骸骨歸民號踊執紼者

干計以上平湖程志

韓炯號宇定奉化人歲貢生天啟初任訓導沖淡自適好

與志士交諸生貧不能贄者反惠之力卻童子贄蔬食

飲水陶然也陞分水教諭平湖朱志

顧國寶字珠巖南通州人天啟進士知縣事性剛介政主愛民而務必行其法漕規久弛國寶力裁額外加耗又酌立收兌永制軍民帖然有奸商請於鹽使者議設批驗所於縣之西門外國寶力持不可事得寢捐俸置義田三年調嘉興秩滿擢吏科給事中平湖程志參袁志

趙廷桂字肩峩江山人歲貢生天啟中任訓導性樸率與士子講論循循如家人父子任數月卒及門哀之平湖程志程楷字公式合肥人天啟進士知縣事折獄平允催科不

迫構三式館與教諭楊儁卿講學其間得法體縣志稿
增修之文獻賴以有稽祀名宦

平湖張志

賴垓字宇肩德化人崇禎進士知縣事性貞介人不敢干
以私政務平易爰書讞語飾以經術善藻鑑士習文風
翕然不變學宮災畱羨金以佐修葺擢翰林院檢討

平湖

朱志

柴世皋字式穀仁和人舉人崇禎七年任教諭博通經術
勤課士嘗率邑人修葺學宮祀名宦

伊志

陶嘉祉號盟冰武進人崇禎進士知縣事一月卒有異政
民思之爲立陶公墮淚碑

浙江通志參袁志

吳春枝字元萼宜興人崇禎進士知縣事才敏而機警徵

輸有法歲饑加意賑恤全活無算

浙江通志

國朝

劉秉鈞字參字奉天正紅旗人順治八年知縣事禮士愛
民而性嚴毅江上有警漕兌囂然秉鈞率家丁彈壓之
旗軍不敢額外苛索以世職改武歷任山東登萊總兵

平湖朱志

朱之翰字鶴門上元人順治進士知縣事潔己愛民不妄
用官庫一錢故事徵糧用櫃收每勒火耗之翰首行自
封自兌法臨倉供應槩行罷免秩滿去任行李蕭然歷

官河南提學

平湖朱志
參吳志

張應麟號振仲鄞縣人舉人順治十三年署教諭性貞介不苟取與而和易近人時學宮久圯僦舍而居蕭然布蔬不問餽遺士子貧者時捐俸周之陞直隸平鄉知縣

平湖
朱志

陶鑄字子固烏程人舉人康熙初任教諭為人和煦不苟

嘗笑論學宗程朱以孝友訓士祀名宦

伊志

王召字徵先烏程人康熙六年署教諭以興教率化為己任重名流恤寒士待下嚴整學宮之體始肅以憂去

平湖

朱志

謝師昌字維賢鎮海人歲貢生康熙二十二年任訓導為學有本勤課諸生凡貧而有志者尤加意獎勸以詩文就質者戶外之屨常滿雖修脯不具不計也秩滿得江

西布政司經歷自言作吏非所願乃告歸

受中
編

呂猶龍字爾霖奉天正紅旗人監生康熙三十一年知縣事值饑饉後一意撫綏夏旱步禱甚虔時出郊野勸農詢民疾苦給酒米以慰勞禁絕請託遏抑強暴兇猾不逞者相率屏迹先是徵解南糧有貼解浮面諸耗猶龍悉裁去之創橋梁緩催科葺城垣一切興革百姓盡蒙其福在任四載以憂去邑人樹坊通衢顏曰召伯所芟

案坊今無考後爲運使行經平湖父老遮道迎之累擢福建

浙江巡撫祀名宦

王國英字俊侯奉天正白旗人康熙三十九年知縣事以撫字爲主不事催科清操自矢在任五年終始如一去

官一邑如失慈母以上吳志

董天眷字紫來奉天正黃旗人歲貢生康熙四十五年知縣事以崇儒重道爲己任集諸生學舍給膏火延純儒與講說爲政寬平不尙嚴酷遇奸宄蠹胥必盡法懲之邑向無育嬰堂天眷始建堂六楹捐俸置田爲乳哺費活嬰無算後調錢塘平湖張志

顧之翰太倉州人監生康熙五十一年任主簿讀書勵節不取民間一錢出入坐一破肩輿自僱腳夫二名昇之

屏去儀從遇事無所忌諱人稱爲顧青天西野筆談

孫右翼字衛如鉅野人吏員乾隆二十一年任主簿潔己自好縣有委理訟事必先理論而後裁之以法居平鍵戶課子讀書爲詩亦灑然有致知縣劉純煒知其貧歲分祿米爲助任滿歸平湖王志

劉純煒字仰仲諸城人進士乾隆二十五年由海甯調知縣事聽訟勤敏凡前任累年未結案牘斷一空邑奸猾侵漁里閭廉得其名榜治前罪大者按法流配之徽

人許姓者負富家金繫獄數年榜掠無完膚純煒出諸
囹圄脫赭衣釋歸曰吾豈承富家指重苦貧民耶擢杭
州府東海防同知歷官順天府尹

平湖張志

周大樞字元木山陰人舉人乾隆二十六年任教諭為人

樸懋研窮經學自漢唐以來注疏家言皆能條舉縷析
尤邃於易諸生中有篤學好古者口之不置多所造就

居九年卒於官著有存吾春軒詩集

周昭仔字湘岸湘潭人舉人乾隆三十二年知縣事性寬

厚不嚴責扑不急催科訟簡刑清公餘讀書不輟月課
諸生恆親加甲乙與教諭周大樞最相得過從講論無

間任四年卒於官

以上平湖王志

王恆字久也遵義人舉人乾隆五十年由慶元令調平湖

潔已奉公善斷獄摘奸發伏宵小屏迹重文教增建當

湖書院屋五楹修陸清獻墓道清釐其地之被佔者丙

午夏旱開橫橋堰以通泐之上流潮汐大至民利賴之

重修縣志十二卷

伊志

易鳳庭字梧岡廣西桂林人以進士授知縣嘉慶十四年

由永康攝平湖剛明知大體敬禮紳士而不可以私干

日坐堂皇凡疑難之獄無不片言立決先是邑中無賴

子所在成羣日以鬪毆為事人患苦之密擒得其魁痛

繩以法其黨始散民以安靖莅任甫及六月令行禁止
比去時雖下至販夫走卒莫不太息有泣下者于志

邱永安字靜齋甘肅綏來縣人官乍浦巡檢司遇有訟事
必先理論而後裁之以法工詩善寫蘭竹得顧定之吳

仲圭遺意于志

李宗傳字海帆安徽桐城舉人狀貌豐腴有大度嘉慶年
前後兩署縣事廉潔自守痛懲豪強尤愛培植士子榜

眼錢福昌為邑試時所得士勉以讀書當成大器其知

人鑒類如此新纂

朱煌字勿軒直隸青縣舉人道光十七年知縣事邑故有

豪門子弟愚弄良民利其財遇事輒令與訟煌洞悉其

情聽訟必根究作俑者至是都為斂攝焉居官二載胥

吏不敢因緣為奸善弭盜賊四境肅清後官杭州知府

新纂

董莖字青原福建閩縣人河道總督觀潮子履任數月報

最移錢塘後升任杭嘉湖分巡道省城初陷從容作書

入解井死忠義錄有傳

毛元坤字補南江山人乾隆甲寅舉人任教諭直己守道

訓諸生務崇實黜華邑人受業者戶外屢恆滿新纂

趙泰字心蓮仁和人嘉慶癸酉舉人任訓導文章一宗理

法邑中卜祿鈔何紹瑾屈欽鄰輩親受薰陶先後登甲
 乙榜為人剛正不阿遇諸生有委曲事力周旋之縣署
 紀綱儼居戈嫠婦屋恃勢侮虐戈邀族諸生某控諸縣
 幾不得直泰毅然向縣令剖之謂事關同族分所應為
 且內丁家居於外如關防何居恆廉潔卒無餘資諸生
 經理喪事歸櫬里門新纂

許乃裕字敬齋仁和舉人道光癸卯任教諭學中故有羅
 侯義田乃裕創為月朔課士膏火寒士感焉邑中素無
 賓興盛舉胡良佐良俊昆季相繼捐田九百餘畝為登
 瀛局由乃裕贊成之士林至今稱道弗衰新纂

吳汝霖字時菴建德拔貢生順天鄉試舉人道光二十三
 年任訓導性淡泊虛懷下士訓迪有方邑人陸錫智曾
 任嚴郡教授汝霖親受業焉錫智沒家無儋石招其孫
 至署中飲食教誨之善繪事尤工墨松然不輕下筆後
 卒於官新纂

林樹錦順天大興人任主簿清廉自矢不妄取民間一錢
 值委理公事時開誠善導之莫不情吐其實旋卒於任
 邑人助資以歸其櫬新纂

項順植順天大興人任典史數十年清慎有聲嘗典朝衣
 以供朝夕上官知其廉恆分俸濟之工書得鍾王筆意

新纂

周維楨字片玉江西福安人咸豐十一年任乍浦巡檢三月賊犯乍浦駐防殲焉維楨猶招集民團力刃數賊創甚大呼殺賊而死得

旨優卹

浙江忠義錄

石門縣

宋

吳伯舉括蒼人元豐八年知崇德縣先是廟學皆廢慶歷中始議州縣立學伯舉經始為諸邑先豐約稱事聚學者擇經師教以義理文章務中有司之程四方聞令賢皆來學恐後舊繪像于邑庠今祀名宦
劉志參崇德新志

錄事參軍

張公秀字仲實吳人美詞翰紹興初為崇德丞升臨海令皆有善政後就崇德家焉
以上趙圖記

黃揚紹興間知崇德縣縣治自罹建炎兵火鞠爲茂草寄
治廣法院者二十餘年揚至始建縣治區處有方民不

知擾明一統志

冷世修字良器常熟人進士紹興間崇德簿知州張瑜異
其才移攝理掾郡獄屢空終知建康軍趙圖記

葛邠字楚輔江陰人進士乾道初知崇德縣以樂易處心
以儒術飾吏事治舉大綱鎮以至靜綽然有循良之稱

明一統志案葛邠崇德人志作葛邠字用光青陽人

黃幹字直卿閩縣人受業朱熹授油子郎監台州酒務調
監嘉興府石門酒庫前此庫官武夫子弟爲之既律

身不廉而吏恣爲姦官醜本薄私釀橫行故積負上司
錢以萬計幹既至以官錢自往市米于產米之地凡纖
悉必躬親雖隆冬烈暑不憚也歲入需然或謂瑣瑣者
何足以煩君子幹笑曰孰非公家事耶在官申酒庫利
弊侍郎辛棄疾枉車騎見之歎曰是爲乘田委吏者也

歷知安慶州學者稱爲勉齋先生宋史本傳參崇德新志

樓寅字仲甫東陽人寶慶中知崇德有吏能始至即究極

源流疏剔弊蠹發爲教條俱有準繩明一統志參柳志

黃元直字致君會稽人淳祐間知崇德修學校興農課尋
訪故實平易近民庭無留訟囹圄久虛以最績聞劉志參吳

志按明一統志及柳趙志俱作夏元直崇德靳志作黃元直劉志分夏元直黃元直為二人誤

元

鄧文原字善之綿州人大德二年崇德教授博學工文家

貧行潔學者尊事之終集賢直學士柳志參趙圖記

盧禮明一統志作盧祥字仲敬太平人至順初知崇德州值旱澇

相仍民多流離召富民勸令出粟減糶價之半以賑乃

計口更番以糶三日而盈四千民賴全活上議於府令

商賈富僧均買引鹽省民鹽鈔三萬八千餘錠興學修

社均賦恤刑民感之如父母柳志參趙圖記崇德靳志

王雍字元肅至正二十年任崇德州律已公廉臨事明敏

遷改儒學建明倫堂陞蘇州府同知崇德洪志

秦約字文仲崇明人至正間司教崇德以學行聞洪武初

應詔試慎獨箴拜禮部侍郎母老辭歸趙圖記

按石門鄺志職官表載至正時有州同知夏蔣二丞具失其名周致堯俞鎮皆贈詩事蹟無考附錄于此

明

畢輝洪武中知崇德縣與縣丞齊搏同心執法有旗軍來

自京師公幹恣橫輝械繫以聞上嘉之遣行人齎勅勞

之大清一統志

涂順建昌人進士永樂中知崇德廉勤自持滿去諸所用

器封歸筦庫一物不攜

辛耀萊州人前陝西按察使謫戍宣德中起知崇德貴使乘傳過邑求索無厭耀以禮接之不徇其求省民財視

昔倍蓰云以上趙圖記

焦寬字仲容葉縣人進士正統中知崇德明敏善撫字教育生徒修學舍館給之親為離析經義多所造就六載

擢監察御史崇德新志

郁綸字理之德州人進士景泰六年任崇德時縣署廢久

自學校壇壝祠宇悉規畫繕理大盜章正等為患設方

略擒之民賴以安性剛直忤當道罷崇德洪志

王輿巢縣人舉人成化初知崇德愛民教士修舉廢墜三二

載召為御史趙圖記參劉志

彭禧字樂善崇安人國子生成化中任崇德丞縣當要衝

疲敝禧隨事區畫具有綱領惠安貧弱百姓大和六載

乞休縣人不忍其去送錢塘涕泣為別

張超字能達安福人進士成化中知崇德自奉儉約政尚

寬厚遷刑部郎中

袁端新淦人舉人嘗主白鹿書院成化中為崇德訓導舉

白鹿規約束生徒遷教諭

湯沐字新之江陰人進士宏治中知崇德時徽人相與殖

資縣中取民倍稱之息民不能堪沐下令捕之皆散去

省裁夫廩之費歲至萬緡增置縣市里甲以均供應禁

治喪用浮屠及觀美相誇者躬課生徒館穀獎勵之抑

強惠弱興利已害服食器用悉自家攜來六載召為監

察御史官至大理卿

以上趙圖記

陳伯諒字執之福清人進士正德中知崇德嚴制豪強尤

痛繩黠胥獄訟衰少凡學校公署多其修建在任三載

境內肅然擢監察御史

崇德斬志

洪異字大同龍溪人舉人正德中知崇德開天長河以灌

邑之干乘鄉蕪地盡成沃壤新學校置義塚修建橋梁

皆久遠之績居五年政成擢御史時典史李滋字子潤

宜興人亦廉能稱任使異舉善政輒佐之尤篤於學校

每得閒地皆構屋取賃錢給學徒膏火至今利之濬市

河運士為文璧山桂山

趙圖記參崇德斬志

徐之鸞

趙圖記作齊之鸞

字瑞卿桐城人進士吏科給事中正德

中言事忤旨左遷崇德丞勤政愛民擢知長興官終副

都御史

崇德斬志

陳相字君輔洛陽人進士正德中知崇德縣為人剛果時

中貴用事其黨至邑者賂遺之相獨不為禮一切裁抑

巡按廉得其狀有不畏疆圉之稱擢御史

嘉靖浙江通志參劉志

張守約字彥博華容人進士嘉靖中知縣事為政務舉大

綱不責苛細崇學校端習尙摧強撫疲豪右惕息自奉
清約客過者出蔬飯對餉進生徒講課激勸興復傳貽
書院樹先達諸坊表於前爲多士思齊之勸張侍御按
崇歎曰張令能作此好事耶薦陞大理評事去之日圖
書數篋士民思之

艾鼇新建人隆慶五年由舉人知縣事廉潔好修性甘澹
泊接士大夫以禮譚藝懇懇不倦所食蔬魚不取民
尤勤撫字時秋霖當道督課亟鼇曰青黃不給吾甯以
官博民乎調知長樂陞建水知州

蔡貴易同安人進士隆慶六年知縣事居官明敏力除奸

弊過目不忘靡所遺漏歲卻羨餘申減驛費時含山盜
楊雷輩橫里中當道議發兵貴易徐以方略縛致一境
晏然尤善迪士類拓學宮建尊經閣復包角堰蒞任五
年終始如一擢去士民相與構四知亭立碑以識思焉
石鐘湖口人監生萬歷元年任教諭性温厚中有涇渭以
禮自律遇事抗論不回公租出入不染指力辭餽遺諸
生貧者捐資以助去之日皆揮涕不忍別以上劉志
陳履字德基廣東人嘉靖進士初令下雋再令海陽最後
令崇德一切務從長厚鎮躁以靜養威以寬不爲鷹擊
而政平訟理浙江通志

朱維京字可大萬安人大司空衡之子進士清介自持剛

正寡諧不附江陵謫判汝州調崇德政務寬大先是丈

量田畝屬之平湖令截弓三寸致浮舊額五千餘畝維

京悉復舊額民大感悅逾年陞工部主事士民思之入

三賢祠劉志

孫承謨字含冲侯官人進士萬曆十二年知縣事治多惠

政往年漕糧皆由糧長收發謂之九收一發此甲值糧

長彼九甲漠然不顧逋欠欺賴糧長賠累無不破家承

謨創立各收各發例一時便之石門志

陳允堅字貞甫長洲人進士令諸暨調崇德其興除盡中

窾會凡學校郵傳廟壇倉廩吏解犁然修舉至今賴焉

卒于官崇德志

案崇德志又有張廷相韓嘉善蔡廷臣汪在前方現俱知崇德縣其政績卓卓有大過人者韓以例貢通籍

豈弟廉介尤繫人思未詳履任年代已附載干表

靳一派字宗源海澄人萬曆間由舉人知縣事捐助學田

纂修邑志鋤擊豪強奸民斂迹值歲大水賑飢卹患士

民懷惠遷潁州知州袁志

陳心得湖廣永定衛舉人萬曆庚申令崇德愛民多惠政

司藥局失火奮身捍患以砲傷立斃縣人傳其為神云

石門志

嘉興府志 卷四十三
余鼎字匡九仙居人萬厯間爲崇德訓導明經講學亶亶不倦著有孝經訂正行世

孫繼祖字繩武武義人萬厯間爲崇德教諭一介不苟以道義約束諸生有不率輒懲之升平山知縣

高士選字毅農長樂人舉人天啟時爲崇德令有陸符虎金象精者挾其貲橫行鄉里士選執法翦除之又禁革蠹吏私派重繩里胥之需索虐民者以不得志挂冠去

以上吳志

何獎賢廣東人明經任邑丞敬士愛民協恭盡職

鄭滂字甘澍湯陰人由進士初任山東魚臺令調浙江運

司知事甲戌署縣事洞察積弊豪強斂迹待紳士謙恭有體然不可干以私泄政九月潔己秉公如一日遷延

平推官

以上石門鄭志

林沖霄字雲容霍邱人進士崇禎時爲崇德令值編審嚴釐花分詭托諸弊賦役得均性慈祥刑不妄施累官給事中

劉國會字恆岳武陵人舉人崇禎時爲崇德令修葺學宮

鼓勵士子一時人文蔚起爲政寬厚不苛於法士庶呼

爲長者

以上吳志

孫肇元字若木武康人明經任教諭持守清介倡修學宮

石門
鄭志

國朝

鄧國棟字上簡大興人順治初以杭丞來署邑事時境內多盜焚劫肆起國棟下車擒其渠魁殲之略盡追糧不事鞭扑而完解如期南征大兵經臨承應合宜鄉城無

擾石門
鄭志

陳邦寄字震軒完縣人順治九年以廕生知縣事時海氛方熾匪黨嘯聚村落邦寄多設法撲滅之歲大旱齋戒步禱漕務杜絕陋規撫卹糧里以誥誤去人感惜之韓文鋒字二水長安人進士康熙元年知石門縣潔已愛

民謙恭接士邑催征往往頑戶逋賦官責見年文鋒設飛票止追欠戶在任八月去

謝元瀛字定夫饒平人進士康熙三年知縣事為政寬平

燭奸釐弊不遺餘力縣當孔道供億煩費牒請隣邑協

濟民困稍蘇誥誤去

以上石
門鄭志

杜森懷柔拔貢康熙八年知縣事縣向以吳越戰場棄地照課均攤徵解無着官民交困歷任者莫可誰何森至卽籲請蠲荒剴切千數百餘言上流聽之為之題免先時里多而田錯襍乃減里均田一清積弊凡學宮書院便民倉白糧倉及永安橋漏澤園諸工作皆次第修之

于志

管鳳來蕭山人康熙十一年為石門教諭以六經訓士子

始宗實學

吳志

張作礪字石齋玉田人由郡貳守攝縣事德望素著胥役畏服若神明豪猾屏跡不敢犯法善政具舉洩治四月去士民立碑頌之

于志

鄭世培字晴嵐湖廣臨武貢生康熙十三年知縣事政尚寬和蒲鞭示辱前令杜森輯邑志未竣而歿世培捐俸續成值積疲之餘能修舉廢墜十四年夏五月縣堂圯時方坐廳事胥吏死傷甚眾世培出崩棖積瓦之中神

色不變人皆異之

于志

傅以履聊城歲貢康熙二十八年知縣事潔己愛民嘗步行村落間有婦姑篝燈夜紡間相謂曰天寒甚盍以酒禦之婦熱酒進姑笑曰此酒可比傅公蓋以家釀清冽比公之風操耳時貧家子女多年長不婚者論耆老以儉率俗恆捐俸為嫁娶之資在任三載惠政甚多擢刑部主事

于志

李灼文安人進士康熙甲寅知石門縣耿藩之變境內屢有兵擾土寇陳彪富二等乘間橫行玉溪鎮灼故嫻武藝偵知中秋夜羣盜會飲于某所促裝持械單騎潛行

命兵役尾後直入盜所盜方飲不知爲令也羣起搏之灼擊仆數賊兵役繼至獲匪黨數十人分首從置之法由是餘寇奔散民賴以安

倪瑄成都人乾隆元年以舉人知石門縣愷惻慈祥民爲觀感有兄弟爭產者瑄命擇一小室止設一榻置二人于中明午召至未及問兄曰罪在我弟曰我不遜罪在我瑄曰然則產究誰歸兄弟相讓愿公合族作祀產案遂結前後宰邑凡十三年政簡刑清訟庭草長有白鶴來集獄樹卓異擢刑部主事

吳迪琛號梧岡山陰人舉人乾隆十年司訓士風翕然不變嘗曰藥無美惡入吾籠者皆堪充用在治方者得其宜耳以詩法授後進邑諸生之嫻韻語者皆其教也六十辭官寓邑之東河塍時邑令王善櫛亦以謝職僦居東寺與邑之名士日相過從爲眞率會卒寓舍歸葬著有梧岡詩文鈔

王善櫛字令樾含山人乾隆十九年以舉人知石門縣孤介絕俗榜於堂曰不貪以爲寶有慾焉得剛擊強暴扶孤弱積案未結者日理數事不三月而畢境有積匪吳二章二羅三錢六設法捕之翦其黨翼訟師蠹役整治一清葺傳貽書院爲講習之所按季試士品題確當隣

邑諸生多攜硯就試者修城垣橋梁舉無累于民乙亥春勞禱城隍廟曰邑政缺失罰當在令百姓何罪遭此淫潦言訖涕泗橫流拜伏不能起禱畢雨即止歲仍有秋爲忌者所中被劾去瀕行民扳輿號泣填塞不能行夜潛去著有禦兒集以上伊志

鮑祖幹字晉貞蕪湖貢生乾隆二十八年知縣事勵精有爲善于折獄凡前任累年未結案悉爲判決夏旱步行虔禱立致甘霖罷歸時士民泣送者千餘人

杜正藹東陽優貢乾隆間任訓導博通經史多所成就如陳萬青萬全吳震起鄭稱皆出其門生平尤致力於詩

著有書畫舫榜人橐語溪偶吟秋興詩各一卷

程易揚州人乾隆四十年由鹽分司署縣事寬仁愛民不事苛細在任六月吏民誦德不衰

朱麟徵宜興舉人乾隆四十六年知縣事甫下車即訪拏訟師嚴懲匪類政紀肅然捐俸創修文廟事所當爲無不具舉

費震仁和舉人乾隆四十八年任教諭性情蕭爽樂于誨人士類深受益焉俸滿保薦知縣所至有賢聲

俞上運徽州人乾隆五十年由鄞丞署縣事值亢旱冒暑步禱不辭勞瘁復至諸鄉親勘災田詳請緩徵出倉穀

嘉興府志 卷四十三
平耀勸諭富民捐粟救濟饑民均沾實惠竟積勞成疾
卒可謂以死勤事者矣

鄧雲龍山東拔貢乾隆五十九年署縣事性慈祥催科不
事敲朴至竊匪棍徒必盡法懲治後陞南安知府

方維翰大興監生嘉慶四年知縣事潔己愛民以德化導
創立崇文書院集諸生會課捐俸以資膏火歷久不懈
喜吟咏尤工書翰後署嚴州同知卒于官

曹鎬江西人嘉慶九年由嘉興丞署縣事仁心爲質不事
煩苛辦理水災勸殷戶賑濟活饑民無算

洪鍾傑樂平貢生嘉慶十一年知縣事居心仁恕不以察
察爲能興葺學宮置立義塚凡有益于民之事次第舉
行創議捐廉修城未竣旋丁內艱去

周雲杼字湘雯桐鄉人寄籍烏程官石門縣教諭兼署縣
篆訓士不倦結文社於語溪學舍一時知名之士咸樂
與之遊性慷慨仗義諸生有力學家貧者無不極意栽
培工詩著有蘋洲小詠古今體詩採入桐溪詩述中
耿維祐新城進士嘉慶十五年知縣事寬厚慈惠不事刑
朴有爭訟者力爲勸諭氣平率相解以去遇事體察周
知民隱陞任去

關樹菜仁和舉人嘉慶十八年任教諭品學端邃文章行

誼不染時趨己卯修學宮與邑紳士親為經理極勞瘁
焉卒于官以上于志

鄧廷彩四川崇慶人道光初以軍功知縣事甫下車盜賊
斂戢片言折獄吏不能欺盛夏下鄉察民隱見勤於耘
耔者給巾扇或勞豚酒會包角堰橋圯捐廉倡建民呼

為鄧父橋新纂

盧昆鑾江西萬載人道光間由進士知縣事以傳貽書院
舊址湫隘購地青陽門建屋宏敞聚諸生絃誦其中為
政尚平恕不以苛細擾民民咸德之新纂

李宗謨湖南善化人道光辛巳舉人咸豐二年截取來浙

由太平縣調補石門八年到官十年四月嘉興既陷賊
去石門九十里時出擾宗謨激厲兵勇守禦屢卻賊鋒
七月張玉良師潰外援絕賊益橫悉力攻石門三晝夜

城陷死之浙江忠義錄

閔希濂字逸雲烏程舉人同治乙丑任石門教諭勗士砥
礪名節有進賢文字者援筆改愜出入經史所造皆知
名捐俸置文廟祭器歿後士林思之新纂

楊純禮字卓峰順天大名附監生任石門主簿佐治勤慎
邑令俱倚重之同治五年兼玉溪洲錢算緡事上不誤
公下不病商清俸所入置書數萬卷日夕諷誦于洲錢

開生賢文社培植士林邑有善舉靡不慷慨倡捐玉成其事以積勞卒新纂

[Faint bleed-through text from the reverse side of the page]

桐鄉縣

明

牛用和蓬萊人國子生宣德五年桐鄉始分縣用和為令經營草昧凡城郭衙署一切所為俱得其領要民皆樂從以憂去繼用和者趙中代州人亦以太學上舍宰是邑能因用和之緒去苛去擾民歌思之桐鄉徐志案見聞雜記聞令初選者牛姓用和名宣宗覽之曰民之父母何以姓牛御筆改牛字為生字

田玉字德潤內江人國子生正統中知縣事勤卹民隱時閩浙盜起軍需繁重玉寬假獎率貧富適宜民用不匱以艱歸父老上疏乞畱服闋又上疏力請復任與民益

親內外整飭六載陞知瑞州府

柳志參桐鄉徐志

張泰字見為樂亭人國子生景泰初知桐鄉視民疾苦去

兼併招商賈為邑大利又繕完公署學校壇壝土木屢

興而民不病九載多成績

鄧珙順昌人國子生景泰中授桐鄉丞佐理廉能多所建

立有公清勤慎之操九年任滿如一日

王哲金鄉人舉人天順中知桐鄉德器温粹政尚寬平以

外艱歸民立碑紀德

孟俊字世傑咸甯人舉人成化中知桐鄉廉明有膽略理

弊剔弊敬老卹孤威惠並著尤加意學校居七年召為

監察御史歷官布政司參政

以上劉志

胡憲鄆城人國子生成化中為邑主簿性端嚴吏民不敢

易之頗著勞績

袁志

孔公潤字澤文曲阜人至聖五十八世孫國子生宏治中

為桐鄉丞儒雅有惠愛三年以老乞休

劉志

王吳字汝欽衡陽人進士宏治中知桐鄉除田糧詭欺之

弊修舉廢墜以廉介有為稱五年召為監察御史

趙圖記

徐珪應城人吏員宏治中上封事除桐鄉丞慷慨重節義

有幹局縣事多賴以辦三年陞高唐州判官歷贛州府

同知

劉志

陳詒湖廣安仁人貢生宏治間任邑丞民病疫俗尚禱祀
詒力禁之捐俸購醫藥民賴以活因有佑我鬼神藥我

陳丞之謠擢知鹿邑以疾乞休

仲志新補纂

李廷梧字仲陽莆田人進士宏治十三年知縣事有才識
遇事迎刃立解吏不能為奸修學校平賦役正祀典平

聽斷文章政事一時稱美四年召為監察御史

桐鄉徐志

張紘字文儀上海人進士正德初知桐鄉篤厚慈惠有循

吏風遷知高唐州

袁志

楊璨字仲玉江南華亭人進士正德初知桐鄉令飾吏事
以儒術不為阿曲居半載監司薦其才改知開化去桐

之日民攀轅載路後陞刑部主事

任洛字仲伊鈞州人進士正德初知桐鄉明敏公廉修舉

廢墜桐鄉志書皆其手定三年以憂去行李蕭然累官

都御史

以上袁志參桐鄉徐志

蔣琪字信國深陽人進士正德中知桐鄉治尚寬恕然能

繩東吏卒不敢為奸工詩畫畫尤珍重於時遷工部主

事

桐鄉徐志

范來賢字昌國常熟人進士嘉靖時為桐鄉令英察果斷

決獄如流三年陞刑部主事

袁志

方克字惟力桐城人進士知桐鄉縣寬厚簡重有循良長

嘉興府志 卷四十三
者風擢監察御史

劉志

金燕字尚賓號芝川潛山人進士嘉靖三十三年知桐鄉性廉介才猷過人始蒞任值倭寇圍城城幾不保燕百計禦之城以得全召補禮科給事中民感慕立生祠

分省

人物考

錢淵廣德人嘉靖時以舉人爲桐鄉教諭廉敏有學日偕諸生談論經史評隲文藝不少寬假勸人以六德六行有浮薄者輒遣之廩生金某貧不能葬親淵捐俸瘞之見婦人泣于道詢知其夫負富民錢將鬻身以償淵召富民至好語勸之且云若如吾言吾當請于令以旌汝

義富民卒感動勉其夫償更與之金

袁志

江萬和字一中黟縣人舉人隆慶己巳知桐鄉縣秉性耿介興學校清賦稅逋逃者悉招撫之昭雪張樽等冤獄

後陞膠州知州

桐鄉徐志

蔡時鼎字和甫漳浦人進士萬曆甲戌知縣事年甫弱冠初至不露圭角吏人欺之一日坐堂皇顧吏曰今日新官上任矣將平日所欺事一一摘發合邑驚爲神精敏剛斷事無巨細莫能隱居官約素有製裘贈者堅卻之以艱歸跣足扶柩出邑門百姓男婦皆爲流涕後擢御

史

袁志參桐鄉徐志

須之彥字君美號日華嘉定人進士萬歷丁未知桐鄉事
次年五月大水田疇盡淹之彥親循阡陌請於上官乞
疏免本年田租水落勸民播種是秋大熟賦復減十之
七民賴以全去官之日行李蕭然邑人周拱宸作萊釜
生魚賦以美之

藍應斗景陵人舉人萬歷庚戌知桐鄉為政首懲貪風勵
胥吏剔弊均徭興文敦俗卒於官

以上桐鄉徐志

胡舜元江西餘干人進士萬歷間知縣事素有風骨遇事
敢為桐地倍收於田而田賦轉重於地有力者占地日
多貧民陰受加賦之累舜元為陳請憲司田地均為一

則賦平弊絕民甚德之又毀淫祠禁左道嚴保甲正婚
姻戒燬屍諸善政並見於所著理桐拙操

仲志及楊園集新補纂

沈延慶遼東人崇禎壬午任教諭慷慨有志節甲申三月
聞都城失守痛哭不食而死

新補纂

王士鏞號勉齋金壇人進士崇禎壬申知縣事御民以慈
待士以禮悉蠲文網而吏不敢為奸五年內召士民攀
轅不獲肖像立祠

袁志

盧國柱江陵人舉人崇禎丙子知桐鄉縣三載將入覲校
官應信遇風曰公律已廉為民惠竊聞郡邑入都皆有
餽遺公不能獨無國柱曰降調不失首蓿齋以百姓難

得之財經營一官吾不為也應退語人曰與公周旋久今日乃見其心

嵇之楚字蒼梧德清人舉人崇禎辛未教諭桐鄉令諸生各舉所知獨行者書講堂察諸生甘貧有守者告於邑令發學租周之宮牆久圯廟廡堂廂射圃靡不頽廢悉加修治釐訂禮器祀名宦

以上吳志

黃徽允號慎庵晉江人進士知桐鄉縣崇禎十三年水傷禾稼米驟貴民無以供庸調設法轉移至次年償補課不虧而民不病十五年歲大旱米益騰湧道路殍殮復煮粥賑飢陞任去入

國朝歷官兵部侍郎

國朝

張如戴號琅石閩中人舉人知縣事蒞政以寬數月間政理刑清時

王師南伐路出桐鄉民情驚懼如戴撫馭有方秋毫無犯地方以安立祠城隍廟左

王好仁字玉樞益州人順治間知桐鄉縣寬厚愛人值大旱偕士民步禱晝夜不倦即雨民賴不饑復以民困上請得蠲正賦十之三為治不務深刻政聲籍籍丁艱歸民歌思之歷官淮安府同知

黃輅儁大同人以貢生考授通判降授縣丞康熙三年任
 桐鄉丞潔操飲冰奉公夙夜修城堞築官塘民賴以安
 督造戰艦於海濱留滯經年典衣鬻器以資糧糗居官
 十載處膏不脂而推己與人齋廚屢空晏如也後卒於
 官貧乏不能歸里

徐秉元字子一遼東人蔭生康熙十三年知桐鄉縣自十
 年來無久任之官諸務冗積秉元以次處決安靜不擾
 凡陋規征收火耗槩行杜絕清苦自甘刁訟之風亦以
 感息康熙己未左遷去民追送者數千人泣別徒步百
 里立祠東街以上桐鄉徐志

何金蘭字相如丹徒人進士康熙二十年以中書改知桐
 鄉縣禁無藝之征絕苞苴之入寬猛得中常講鄉約以
 誘良除倉蠹以遏暴一時政教肅然至於修理學宮重
 建雲龍閣開濬城河重啟西水門建羈所以便囚民建
 普同以收遺骨百廢俱興蒞任五年入為戶部給事中
 桐民追慕之祀名宦祠

郭金湯字鞏庵漢軍鑲黃旗人康熙壬申知桐鄉縣潔己
 愛民不妄用官庫一錢割己俸葺城垣士民安枕重刊
 黃石公素書序以梓行

劉鎰字屏山江津人進士康熙庚辰知桐鄉縣歲祲發粟

賑饑建尙義書塾以整飭士習時黃泥洞盜某糾聚無賴白晝殺人鎗廉訪得實率健卒易服微行直入巢穴擒其頭目餘黨悉捕滅之民感其德肖像立祠祀名宦陳大慶字頤伯黃岡人進士康熙六十一年知桐鄉縣才敏機警徵輸有法不敲扑而輸將恐後勞心撫字始終如一

蔡可遠字致甫漳浦人雍正戊申知桐鄉縣外和內嚴折獄平允編審一事最稱弊藪可遠改舊編圖里爲順莊一清飛灑詭寄之弊重建明倫堂名宦祠以勞瘁卒於官

余必夔思南人副榜乾隆己未知桐鄉縣居官儉約愛民息訟著日省錄公事畢輒與諸生講學論文民生子不能哺乳者捐俸勸建育嬰堂至今賴之罷官歸行李蕭然

舒瞻字雲亭滿洲鑲黃旗人進士乾隆乙丑知桐鄉縣治尙簡靜以文學飾吏治嘗曰鷹鷂不如鸞鳳民安之工吟咏與四方名士唱和無虛日每季考鄰邑與試者數百人拔其尤者獎激之刊桐溪課士錄調知海鹽署平湖著有蘭藻堂詩集栖桐小草柘湖詩存

趙選安化人舉人乾隆丁卯知桐鄉縣判事明決牘無畱

滯廉得市井間斗斛大小不一秤輕重不齊易起爭端
親臨查驗禁其奸偽民感其德

李輔德夏邑人舉人乾隆庚午知桐鄉縣聽訟勤敏凡累
年未結案牘讞斷一空民無羈訟每考試勤於論文口
講指畫終日不倦以勞疾卒於官

謝光鐘字震嶠監利人進士乾隆丙子知桐鄉縣聽訟明
決雖事當叢集經理裕如簿書錢穀諸務必親裁決不
假手他人丁丑冬卒於官士民咸哭之

李永泰字東侯繁峙人拔貢生乾隆丙子爲桐鄉丞性剛
介甘淡泊蒞任止一僕隨遇事精敏矯矯不阿尋陞四

川知縣

朱世錫江夏人監生乾隆庚辰任典史廉潔自矢安于淡
泊凡有委審案件經其開導勸息者無不感泣論民以
孝悌力田暇則與士人分韻賦詩工書人珍藏之

耿昭字扶瞻絳州人供事乾隆壬辰任典史隣邑嘉匯兜
有巨窩某盤踞一方擾害閭閻昭獲其魁盜遂息落職
去士庶徵詩送行勒石頌德

以上伊志

程希濂號愴人舉人任教諭持躬誠恪優卹士子有以貧
苦告輒典質助之積俸餘獨建泮橋而奉己淡泊冬無
綿夏無葛布被繩牀晏如也卒于官

于志

呂爾禧字滌圃江蘇武進舉人乾隆間知邑事才幹英敏嚴緝奸宄邑文廟久不治首倡捐俸修葺之以勞瘁卒於官先是民戴其德為立長生祿位至是有哭於庭者

新纂

李廷輝字立山安徽合肥舉人乾隆間來知縣事多惠政尤善培植士類政暇即延見諸生勛以砥行讀書嘗以邑志失修已久延邑人士拾遺補闕手訂成書一邑文

獻賴以不墜新纂

宋咸熙字小茗仁和舉人來任教諭少讀等身書邃於學少詹事錢大昕侍郎王昶皆極賞之早登乙科屢試春

闈不第乃就教職蒞桐後提唱風雅引掖後進日以徵文考獻為事哀集桐邑先哲遺詩自宋元以迄本朝名曰桐溪詩述復各敘小傳紀其梗概俾後來修志者藉資考證又自著有思茗齋詩文集耐冷談詩話惜陰

李日記皆極博雅精核新纂

許繼柏字寶巖無錫人道光初官桐鄉丞三年大水縣令王鼎銘病不任事凡勘災勸分彈壓飢民等務悉以委之事賴以濟尋保知縣丁內艱歸服闋授蕭山縣丞委辦海塘工竣攝淳安縣篆三十年推升直隸新樂縣知縣以年老乞休咸豐十年四月無錫戒嚴家人請遠避

嘉興府志 卷四十三
繼柏曰人患不得死所耳我年已九十當以一死報國
及賊至促子孫去畱一赤足婢侍左右十二日賊突入
其門繼柏踞坐大罵遂遇害繼柏為人仁恕里黨有緩
急無不應者與人言必依忠孝居官耿介歸田後足跡
不入城市

江蘇昭
忠錄

李春蘇字煦齋貴州貴筑縣舉人以知州揀發來浙歷宰
劇縣並著政聲同治丙寅權遂安縣事適齋匪煽亂剋
期襲衢嚴二郡春蘇單騎至各邨諭以大義縛魁散黨
不折一矢而亂定壬申冬來權邑事甫下車三日卽親
祭張履祥墓捐廉五百金建祠墓旁祀楊園先代因語

邑人士以自幼讀楊園書卽慕其爲人今官先生故里
以得自效悃忱爲幸在任甫十閱月而政績釐然可舉
邑中捕務久弛特捐厯任所取青鎮船稅錢以養捕役
一時宵小斂迹鄉約久廢因選諸生使各充城鎮講生
朔望宣講 聖諭並捐廉給以月俸後遂沿爲故事聽
斷虛心不執己見邑民有訟士人盜葬祖墓者已斷歸
士人矣復親至其地履勘得實遂翻前斷人心愈加敬
服癸酉夏大旱步禱於神竟不雨因思遇災省刑載在
今甲遂盡釋獄中株連被繫者並察知奸胥有禁錮案
中女子三年不得歸者立出之是夕卽大雨如注田野

